

Bosna i Hercegovina
Federacija Bosne i Hercegovine
Zeničko-dobojski kanton
OPĆINA VAREŠ
OPĆINSKO VIJEĆE



Broj: 01-220/26
Vareš, 29.07. 2026. godine

Z A P I S N I K
sa 17. sjednice Općinskog vijeća Vareš,
održane 29. 06. 2026. godine

Predsjedavajući OV Igor Šimić pozdravio je sve prisutne.

Prisutni vijećnici: Andrej Malbašić, Asim Balta, Asmir Čizmo, Dario Dodik, Denis Kovačević, Dino Ahmedović, Dževad Mahmutović, Edin Ibrišimović, Igor Hinger, Igor Šimić, Nazif Hajrić, Nermin Hrvat, Nikola Šimić, Semir Memić, Srđan Franjić, Šaban Ibrišimović i Zdenko Franjić.

Odsutni: Amela Mešić i Zdravko Barkić.

Predsjedavajući OV konstatira da Vijeće može raditi jer ima kvorum za rad sjednice.

Predsjedavajući OV otvorio je 17. sjednicu s početkom u 14.00 sati u velikoj sali Općine Vareš.

Pored vijećnika sjednici prisustvuju: Mersad Đido, sekretar OV; Ermin Musa, pomoćnik načelnika; Ibrahim Spahić, pomoćnik načelnika; Mervana Hajrić, pomoćnik načelnika; Belma Karamustafić, zamjenik općinskog pravobranioca; Stela Terzić, šef Odsjeka za finansije i trezor; Velida Džafo, sanitarni inspektor; Šejla Kapetanović, direktorica JU „Centar za kulturu i edukaciju“ Vareš; Nihada Gondžo, direktorica JU „Centar za socijalni rad“ Vareš; Jasmina Šijak, direktorica JU „Opća biblioteka“ Vareš; Nikolina Erlbek, direktorica JPU „Dječije obdanište“ Vareš; Suljo Abadžija, direktor JP „Veterinarska stanica“ d.o.o. Vareš i predstavnici medija.

Predsjedavajući OV upoznao je prisutne da je općinski načelnik iz opravdanih razloga odsutan i da će pomoćnik načelnika Ermin Musa po potrebi dati određene odgovore i pojašnjenja u ime općinskog načelnika.

Mersad Đido, sekretar OV izvijestio je prisutne da je na 16. sjednici OV održanoj 01.06. 2026. godine, Vijeće donijelo devet (9) zaključka, četiri (4) zaključka su u toku realizacije i pet (5) zaključka je realizovano. Postavljeno je osam (8) vijećničkih pitanja, na sva pitanja dat je odgovor. Dopunsko pitanje je proslijeđeno nadležnim.

Ermin Musa pomoćnik načelnika pod aktuelnim pitanjima nije imao obraćanje.

(Izjašnjavanje vijećnika o dobivenom odgovoru)

Igor Hinger

1. Traži da se dopuni odgovor koji mu je dostavljen na 16. sjednici OV u dijelu koji se odnosi na zemljište koje nije ustupljeno rudniku, u čijem je vlasništvu? *(nakon eksproprijacije zemljišta, Općina Vareš je jedan dio zemljišta ustupila rudniku za njihove potrebe, a jedan dio je ostao.)*

(Vijećnička pitanja i Inicijative)

Pitanja

Semir Memić

1. „Kada se očekuje potpisivanje ugovora o koncesionoj naknadi i u kojoj je fazi trenutno taj proces?“

Nikola Šimić

2. Zamolio je da se uradi studija u vezi lokalnih cesta na području općine Vareš, uz objašnjenje da u zadnje vrijeme imamo velike probleme u vezi opterećenja lokalnih cesta gdje dolazi do velikih oštećenja u veoma kratkom roku. Traži da se pristupi rekonstrukciji puta na dionicama od Podkamenska do Breze i od Janjušića do Ratnja, jer su to ceste koje mala auta više ne mogu koristiti. Pitanje upućeno nadležnoj službi Općine Vareš i nadležnim u Direkciji za ceste ZDK.

Dino Ahmedović

3. Pitanje se odnosi na jednu od tački dnevnog reda sa predhodne sjednice OV, a tiče se Izvještaja koje su dostavile mjesne zajednice. Međutim postoje mjesne zajednice koje nisu dostavile navedeni Izvještaj. Pitanje je da li mjesne zajednice koje nisu dostavile Izvještaj imaju poseban ekskluzivitet da ono što je propisano Statutom Općine Vareš i Zakonom o lokalnoj samoupravi izbjegavaju, ne poštuju? Smatra da, ukoliko te mjesne zajednice ne dostave Izvještaje, Općinsko vijeće ne treba ni razmatrati odluke koje se odnose na odobravanje sredstava, sve dok Izvještaji ne budu na dnevnom redu.
4. Koja je svrha policijske kontrole na području MZ Pržići, na lokaciji društvenog doma s obzirom da se tu ne vrši nikakav teretni saobraćaj u smislu kamiona koji prevoze rudu u tom pravcu? Skrenuo je pažnju na sigurnost saobraćaja na dionicama od Vijadukta do Mirske krivine, skretanje za procesing Tisovci. Koliko je teretnih vozila prekontrolisano, ukoliko su uočeni prekršaji i koja je vrsta prekršaja napravljena?

Pitanje je upućeno PS Vareš.

Da li je dostavljen odgovor od PS Vareš koje je vijećnik Igor Hinger uputio, vezano za kontrolu vozila. *(Vijećnik Igor Hinger podsjetio je prisutne da je PS Vareš dostavila odgovor, u prosjeku su to 2-3 kontrole mjesečno, odnosno 25-30 kontrola u toku godine)*

Nermin Hrvat

5. Da li Općina Vareš ima u planu sanaciju stepeništa i rukohvata u ul. Perunska, Majdanska i Ljevarska?

Igor Šimić

6. Kada će se pristupiti izradi projekta vezano za stepenište prema naselju Pruga u MZ Vareš, imajući u vidu da je to jedina poveznica centra grada sa naseljem Pruga?
7. Kada se može očekivati čišćenje i sapiranje dječijeg parka i pomoćnih puteva pored parka? Pitanje upućeno Službi za civilnu zaštitu i drugim nadležnim službama.

Inicijative

Nazif Hajrić

1. Inicijativa za postavljanje vještačkih izbočina za usporavanje brzine („ležećih policajaca“) na regionalnoj cesti u naselju Vareš Majdan.
Na osnovu Poslovnika o radu Općinskog vijeća Vareš upućujem inicijativu prema Direkciji za ceste Zeničko-dobojskog kantona (kao nadležnom upravitelju ove dionice regionalne ceste) za hitno postavljanje dva (2) „ležeća policajca“ u naselju Vareš Majdan, na slijedećim lokacijama
 - a. Na lokaciji neposredno prije samog početka uključenja/ulaza u Vareš Majdan (kako bi se smanjila brzina vozila koja dolaze iz pravca Vareša) i
 - b. Na dionici ceste kod autobuske stanice u Vareš Majdanu (kako bi se osigurala bezbjednost putnika, a posebno djece koja koriste javni prevoz). **(Inicijativa podnesena pisanim putem)**
2. Vijećnička inicijativa za dodjelu finansijske pomoći za liječenje djeteta sa poteškoćama u razvoju iz Vareša.
Na osnovu Poslovnika o radu Općinskog vijeća Vareš, upućujem inicijativu prema Općinskom načelniku za odobrenje finansijskih sredstava iz budžeta Općine Vareš, u svrhu sufinansiranja liječenja djeteta sa poteškoćama u razvoju s područja naše općine.
Kao vijećnik u Općinskom vijeću Vareš, usmenim zahtjevom za pomoć obratio mi se roditelj, čije se dijete nalazi na liječenju.
Tražim od Općinskog načelnika da u skladu sa ovlaštenjima, odobri jednokratna sredstva u iznosu troškova za najmanje jedan mjesec liječenja, što bi u ovom trenutku bilo od iznimnog značaja za porodicu. **(Inicijativa podnesena pisanim putem)**

Semir Memić

3. Ulica Majdanska 40 (Prnjavor) – da se postave ivičnjaci (rigoli) uz stambenu zgradu koja se nalazi pored poligona, jer sva voda sa tog dijela puta završi na zidu pomenutog objekta, te mašine prilikom čišćenja snijega isti bacaju na zgradu, što dovodi do stvaranja velike količine vlage u stanovima, a stanari su u više navrata morali i da mijenjaju podove (laminat) zbog vlage. **(Inicijativa podnesena pisanim putem)**
4. Ulica Majdanska 40 (Prnjavor) – stanari traže da se obilježi pješački prelaz kako bi nesmetano mogli da pređu do autobuske stanice i kontejnera za smeće koji se nalaze sa druge strane ceste. **(Inicijativa podnesena pisanim putem)**

Dario Dodik

5. Inicijativa da se za narednu sjednicu Općinskog vijeća, kao tačka dnevnog reda uvrsti „Stanje regionalnih cesta na području Općine Vareš, planovi Vlade ZDK za rekonstrukciju, pitanje održavanja istih (kako u zimskom tako i ljetnom periodu) te vršenje nadzora nad radovima koji se vrše na regionalnim cestama.“ Na sjednicu pozvati predstavnike Kantonalne direkcije za ceste, nadležno Ministarstvo i ovlaštene firme koje vrše vanjski nadzor.

Predsjedavajući OV stavio je na raspravu Zapisnik sa 16. sjednice OV.

Nije bilo učesnika i predsjedavajući OV stavio je na izjašnjavanje Zapisnik sa 16. sjednice OV i nakon izjašnjavanja vijećnika konstatuje da je **sa 16 glasova „ZA“** (odsutan vijećnik Edin Ibrišimović) **usvojen Zapisnik sa 16. sjednice OV.**

Predsjedavajući OV stavio je na raspravu prijedlog dnevnog reda 17. sjednice OV koji je usaglašen na Kolegiju Općinskog vijeća.

Nije bilo učesnika u raspravi i predsjedavajući OV stavio je na izjašnjavanje prijedlog dnevnog reda **17. sjednice** i nakon izjašnjavanja vijećnika konstatuje da je **sa 16 glasova „ZA“** (odsutan vijećnik Edin Ibrišimović) **usvojen sljedeći**

D n e v n i r e d

1. Informacija o poduzetim aktivnostima u vezi povećane koncentracije olova u krvi stanovništva općine Vareš.
Izvjestilac: Velida Džafo
2. Izvještaj o radu JU „Centar za kulturu i edukaciju“ Vareš za 2025. godinu.
Izvjestilac: Direktor
3. Izvještaj o radu JU „Centar za socijalni rad“ Vareš za 2025. godinu.
Izvjestilac: Direktor
4. Izvještaj o radu JU „Opća biblioteka“ Vareš za 2025. godinu.
Izvjestilac: Direktor
5. Izvještaj o radu JPU „Dječije obdanište“ Vareš za 2025. godinu.
Izvjestilac: Direktor
6. Izvještaj o radu i poslovanju JP „Veterinarska stanica“ Vareš za 2025. godinu.
Izvjestilac: Direktor
7. Izvještaj o radu Općinskog pravobranilaštva Općine Vareš za 2025. godinu.
Izvjestilac: Zamjenik općinskog pravobranioca
8. Prijedlog Odluke o dopuni Odluke o davanju u zakup stanova Općine Vareš.
Izvjestilac: Ermin Musa
9. Prijedlog Odluke o zaštiti izvorišta 1, 2 i 3 kao i vodnih objekata u sklopu vodovoda Lalića mlin, općina Vareš.
Izvjestilac: Ermin Musa

10. Prijedlog Odluke o povjeravanju na upravljanje i raspolaganje opremom za prikupljanje otpada JKP d.o.o. Vareš.
Izvjestilac: Ermin Musa
11. Prijedlog Rješenja o brisanju prava vlasništva i posjeda D.S. KUD „Branko Jelić“ Pržići.
Izvjestilac: Ermin Musa
12. Izvještaj o provođenju Odluke o komunalnom redu općine Vareš u 2025. godini.
Izvjestilac: Ermin Musa
13. Informacija o provođenju lokalnog ekološkog akcionog/akcijskog plana za općinu Vareš u 2025. godini.
Izvjestilac: Ermin Musa
14. Informacija o realizaciji ugovora o koncesijama u 2025. godini.
Izvjestilac: Ermin Musa
15. Tekuća pitanja.

Ad. 1.

(Informacija o poduzetim aktivnostima u vezi povećane koncentracije olova u krvi stanovništva općine Vareš)

Velida Džafo sanitarni inspektor u svom obraćanju upoznala je prisutne sa provedenim i planiranim aktivnostima u vezi problematike povećane koncentraciji olova u krvi stanovništva općine Vareš. Izvijestila je Vijeće da je od Federalnog ministarstva okoliša i turizma stigao odgovor na Zahtjev za hitno djelovanje koji je upućen ispred Općine Vareš u kome su naveli da će prilikom objedinjavanja dokumentacije od kompanije DPMetals sazvati sastanak interesornog tima na koji će biti pozvani predstavnici Općine Vareš.

Otvorena je rasprava u kojoj su učestvovali vijećnici: Dario Dodik (*uz pojašnjenje traži da se sastanak interesorne grupe održi u Općini Vareš, postavio je pitanja - da li se mogu rezultati kvalitete zraka objaviti na nekoj web stranici dok se ne izvrši uvezivanje mjernih stanica - da li će biti testirani stanovnici sa područja gdje je utvrđeno zagađenje tla (Semizova Ponikva) i kada će biti nastavljeno testiranje zemljišta - traži da se prilikom testiranja stanovništva uvrsti i testiranje stanovništva MZ Vareš i da se pozovu stanovnici iz Semizove Ponikve*), Velida Džafo sanitarni inspektor (*odgovorila je na postavljena pitanja*), Dario Dodik (*traži dodatno pojašnjenje u vezi planiranog testiranja stanovnika, odnosno ko se može prijaviti za testiranje*), Dino Ahmedović (*uz pojašnjenje upoznao je prisutne da se planirano retestiranje odnosi isključivo na stanovništvo MZ Pržići, Daštansko i Mir koji su ranije bili testirani*), Nikola Šimić (*postavio je pitanje ko je radio kontrolu vode, traži ako postoji mogućnost da se testira voda sa svih javnih česmi u naseljima gdje se vrši kontrola i iz objekata koji su mjesta okupljanja, skrenuo je pažnju da nema ni jedne mjerne stanice na transportnom putu od rudnika Rupice do Tisovaca*) i Velida Džafo sanitarni inspektor (*dala je odgovore na postavljena pitanja i izjavila da će izvidjeti mogućnost sa nadležnim da se postavi mjerna stanica na transportnom putu*).

Zaključena je rasprava i predsjedavajući OV konstatuje da je **Vijeće primilo k znanju**

Informaciju o poduzetim aktivnostima u vezi povećane koncentracije olova u krvi stanovništva općine Vareš.

Ad. 2.

(Izvještaj o radu JU „Centar za kulturu i edukaciju“ Vareš za 2025. godinu)

Izvjestilac Stela Terzić dala je dodatno pojašnjenje za ovu tačku dnevnog reda.

Otvorena je rasprava u kojoj su učestvovali vijećnici: Igor Hinger (*izjavio je da je primjetan napredak u saradnji i aktivnostima koje ustanova provodi u zadnje vrijeme, uz pojašnjenje sugerisao je direktorici da prilikom održavanja svih događaja u ustanovi, bude prisutan jedan zaposleni, izjavio je da će prilikom izjašnjavanja po ovoj tački dnevnog reda biti suzdržan*), Dario Dodik (*skrenuo je pažnju na broj uposlenih u ustanovi i mišljenja je da se treba smanjiti broj uposlenih, uz pojašnjenje izjavio je da svi koji dolaze na Bobovac trebaju da plate ulaznice uz određene povlastice za djecu, uz pojašnjenje skrenuo je pažnju na nacionalnu strukturu uposlenih, izjavio je da će prilikom izjašnjavanja po ovoj tački dnevnog reda biti protiv*), Nikola Šimić (*uz pojašnjenje predložio je da Osnivač povede računa o nacionalnoj zastupljenosti i da se izvrši revidiranje članova Upravnog odbora ustanove i da jedan član bude iz BZK „Preporod“ i jedan iz HKD „Napredak“*), Andrej Malbašić (*traži da se dostavi pisanim putem informacija koliko ima trenutno zaposlenih sa ugovorima o djelu i na kojim pozicijama*), predsjedavajući OV Igor Šimić (*mišljenja je da iako se osjeti napredak u radu ustanove nisu opravdana sredstva koja Općina izdvaja za finansiranje ustanove, sugerisao je na potrebu prisustva direktorice na svim događajima koje organizuje ustanova, izjavio je da će podržati ovu tačku dnevnog reda, uz pojašnjenje predložio je da Vijeće donese Zaključak da se u Budžetu Općine Vareš za 2027. godinu sredstva za finansiranje JU „Centar za kulturu i edukaciju“ Vareš planiraju u iznosu od 70% od trenutnog iznosa, a iznos od 30% sredstava da osigura ustanova kroz svoj rad*), Igor Hinger (*replika*), Dario Dodik (*replika*), Igor Hinger (*replika*), Nikola Šimić (*replika*) i Nermin Hrvat (*postavio je pitanje direktorici koji su planovi za ostvarenje više vlastitih sredstava, izjavio je da će Klub vijećnika SDA podržati ovu tačku dnevnog reda*).

Predsjedavajući OV zaključio je raspravu i pozvao direktoricu ustanove da odgovori na postavljena pitanja.

Šejla Kapetanović, direktorica JU „Centar za kulturu i edukaciju“ Vareš u svom obraćanju dala je dodatno pojašnjenje i odgovorila na postavljena pitanja vijećnika u raspravi (*ni jedna osoba nije zaposlena bez prethodne saglasnosti Osnivača općinskog načelnika i bez provođenja zakonom propisane procedure, ne postoji zakonska obaveza da ustanova za kulturu mora imati zaposlene kao i članove upravnog odbora iz reda svih nacionalnosti, u ustanovi trenutno ima jedan zaposlenik na Bobovcu koji radi sezonski na ugovor o djelu, projekat rekonstrukcije Kraljevskog grada Bobovca je urađen, jedan od zaposlenika uvijek je prisutan na događajima koji se održavaju na Bobovcu, cijene određenih usluga koje pruža ustanova su povećane tako da se ove godine očekuju veći prihodi*).

Vijećnik Nermin Hrvat javio se za repliku.

Predsjedavajući OV stavio je na izjašnjavanje Izvještaj o radu JU „Centar za kulturu i edukaciju“ Vareš za 2025. godinu uz sljedeće Zaključke:

1. Da se u Budžetu Općine Vareš za 2027. godinu, sredstva za JU „Centar za kulturu i edukaciju“ Vareš planiraju u iznosu od 70% od trenutnog iznosa, a 30% sredstava da osigura ustanova.
2. Da se prilikom zapošljavanja vodi računa o nacionalnoj zastupljenosti.

Za riječ se javio sekretar OV koji je uz pojašnjenje poslovnčkih odredbi skrenuo pažnju na određene nepravilnosti u vođenju ove tačke dnevnog reda.

Vijećnik Dario Dodik (*replika*).

Predsjedavajući OV stavio je na izjašnjavanje Izvještaj o radu JU „Centar za kulturu i edukaciju“ Vareš za 2025. godinu.

Nakon izjašnjavanja vijećnika predsjedavajući OV konstatuje da je sa **13 glasova „ZA“, 3 glasa „PROTIV“ i 1 „SUZDRŽANIM“ glasom usvojen**

Izvještaj o radu JU „Centar za kulturu i edukaciju“ Vareš za 2025. godinu.

Predsjedavajući OV dao je pauzu u trajanju od 5 minuta radi dogovora o formiranju zaključaka.

Nakon pauze predsjedavajući OV stavio je na izjašnjavanje sljedeći

Zaključak:

- **Da se u Budžetu Općine Vareš za 2027. godinu, sredstva za finansiranje JU „Centar za kulturu i edukaciju“ Vareš planiraju u iznosu od 70% od trenutnog iznosa, a iznos od 30% sredstava osigurat će ustanova kroz svoj rad.**

Nakon izjašnjavanja vijećnika predsjedavajući OV konstatuje da je sa **12 glasova „ZA“ i 5 „SUZDRŽANIH“ glasova usvojen predloženi Zaključak.**

Predsjedavajući OV izvijestio je Vijeće da će prijedlog zaključka koji se odnosi na vođenje računa o nacionalnoj zastupljenosti zaposlenih i članova UO, predsjednici političkih stanaka razmatrati u narednom periodu.

Ad. 3.

(Izvještaj o radu JU „Centar za socijalni rad“ Vareš za 2025. godinu)

Izvjestilac nije imao dodatno pojašnjenje za ovu tačku dnevnog reda.

U raspravi je učestvovao vijećnik Igor Hinger koji je u svom obraćanju pohvalio rad ustanove.

Zaključena je rasprava i predsjedavajući OV stavio je na izjašnjavanje Izvještaj o radu JU „Centar za socijalni rad“ Vareš za 2025. godinu.

Nakon izjašnjavanja vijećnika predsjedavajući OV konstatuje da je sa **17 glasova „ZA“ usvojen**

Izvještaj o radu JU „Centar za socijalni rad“ Vareš za 2025. godinu.

Ad. 4.

(Izvještaj o radu JU „Opća biblioteka“ Vareš za 2025. godinu)

Izvjestilac nije imao dodatno pojašnjenje za ovu tačku dnevnog reda.

U raspravi su učestvovali vijećnik Igor Hinger i predsjedavajući OV Igor Šimić koji su u svom obraćanju pohvalili rad ustanove.

Zaključena je rasprava i predsjedavajući OV stavio je na izjašnjavanje Izvještaj o radu JU „Opća biblioteka“ Vareš za 2025. godinu.

Nakon izjašnjavanja vijećnika predsjedavajući OV konstatuje da je **sa 17 glasova „ZA“ usvojen**

Izvještaj o radu JU „Opća biblioteka“ Vareš za 2025. godinu.

Ad. 5.

(Izvještaj o radu JPU „Dječije obdanište“ Vareš za 2025. godinu)

Izvjestilac nije imao dodatno pojašnjenje za ovu tačku dnevnog reda.

U raspravi su učestvovali vijećnici: Semir Memić (*pohvalio je rad ustanove i postavio pitanje da li na općini Vareš ima potrebnog kadra/odgajatelja s obzirom da je ustanova raspisala konkurs za prijem tri odgajatelja*), Igor Hinger (*podsjetio je na diskusiju sa jedne od prethodnih sjednica a u vezi stambenih jedinica u vlasništvu Općine Vareš koje bi se ponudile eventualnim zaposlenicima ustanove*) i predsjedavajući OV Igor Šimić (*uz pojašnjenje apelovao je da svi u skladu sa svojim mogućnostima pomognu kako bi ustanova imala potreban broj odgajatelja a sve u svrhu što boljeg rada ustanove*).

Zaključena je rasprava i predsjedavajući OV stavio je na izjašnjavanje Izvještaj o radu JPU „Dječije obdanište“ Vareš za 2025. godinu.

Nakon izjašnjavanja vijećnika predsjedavajući OV konstatuje da je **sa 17 glasova „ZA“ usvojen**

Izvještaj o radu JPU „Dječije obdanište“ Vareš za 2025. godinu.

Ad. 6.

**(Izvještaj o radu i poslovanju
JP „Veterinarska stanica“ Vareš za 2025. godinu)**

Izvjestilac nije imao dodatno pojašnjenje za ovu tačku dnevnog reda.

Nije bilo rasprave i predsjedavajući OV stavio je na izjašnjavanje Izvještaj o radu i poslovanju JP „Veterinarska stanica“ d.o.o. Vareš za 2025. godinu.

Nakon izjašnjavanja vijećnika predsjedavajući OV konstatuje da je **sa 17 glasova „ZA“ usvojen**

***Izvještaj o radu i poslovanju
JP „Veterinarska stanica“ Vareš za 2025. godinu.***

Ad. 7.

**(Izvještaj o radu Općinskog pravobranilaštva
Općine Vareš za 2025. godinu)**

Izvjestilac nije imao dodatno pojašnjenje za ovu tačku dnevnog reda.

Nije bilo rasprave i predsjedavajući OV stavio je na izjašnjavanje Izvještaj o radu Općinskog pravobranilaštva Općine Vareš za 2025. godinu.

Nakon izjašnjavanja vijećnika predsjedavajući OV konstatuje da je **sa 17 glasova „ZA“ usvojen**

***Izveštaj o radu Općinskog pravobranilaštva
Općine Vareš za 2025. godinu.***

Ad. 8.

**(Prijedlog Odluke o dopuni
Odluke o davanju u zakup stanova Općine Vareš)**

Komisija za statutarna pitanja i propise na 15. sjednici održanoj 23.06. 2026. godine jednoglasno je donijela sljedeći Zaključak:

- Komisija nema primjedbi na Prijedlog Odluke o dopuni Odluke o davanju u zakup stanova Općine Vareš te je upućuje Vijeću na razmatranje.

Izvjestilac nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV stavio je na izjašnjavanje Prijedlog Odluke o dopuni Odluke o davanju u zakup stanova Općine Vareš.

Nakon izjašnjavanja vijećnika predsjedavajući OV konstatuje da je **sa 17 glasova „ZA“ usvojena**

***Odluka o dopuni Odluke o davanju
u zakup stanova Općine Vareš.***

Ad. 9.

**(Prijedlog Odluke o zaštiti izvorišta 1, 2 i 3 kao i vodnih
objekata u sklopu vodovoda Lalića mlin, općina Vareš)**

Komisija za statutarna pitanja i propise na 15. sjednici održanoj 23.06. 2026. godine jednoglasno je donijela sljedeći Zaključak:

- Komisija nema primjedbi na Prijedlog Odluke o zaštiti izvorišta 1, 2 i 3 kao i vodnih objekata u sklopu vodovoda Lalića mlin, općina Vareš te se isti upućuje Vijeću na razmatranje.

Izvjestilac nije imao dodatno pojašnjenje za ovu tačku dnevnog reda.

Nije bilo rasprave i predsjedavajući OV stavio je na izjašnjavanje Prijedlog Odluke o zaštiti izvorišta 1, 2 i 3 kao i vodnih objekata u sklopu vodovoda Lalića mlin, općina Vareš.

Nakon izjašnjavanja vijećnika predsjedavajući OV konstatuje da je **sa 17 glasova „ZA“ usvojena**

***Odluka o zaštiti izvorišta 1, 2 i 3 kao i vodnih
objekata u sklopu vodovoda Lalića mlin, općina Vareš.***

Ad. 10.

**(Prijedlog Odluke o povjeravanju na upravljanje i raspolaganje
opremom za prikupljanje otpada JKP d.o.o. Vareš)**

Komisija za statutarna pitanja i propise na 15. sjednici održanoj 23.06. 2026. godine jednoglasno je donijela sljedeći Zaključak:

- Komisija nema primjedbi na Prijedlog Odluke o povjeravanju na upravljanje i raspolaganje opremom za prikupljanje otpada JKP d.o.o. Vareš i isti upućuje Vijeću na razmatranje i usvajanje.

Izjavitelj nije imao dodatno pojašnjenje za ovu tačku dnevnog reda.

Otvorena je rasprava u kojoj su učestvovali vijećnici Igor Hinger (*da li postoji mogućnost da JKP umanji dug Općini za iznos vrijednosti opreme*) i Dario Dodik (*uz pojašnjenje zamolio je da se kontejneri koji se daju JKP stave u opticaj u gradu*).

Zaključena je rasprava i predsjedavajući OV stavio je na izjašnjavanje Prijedlog Odluke o povjeravanju na upravljanje i raspolaganje opremom za prikupljanje otpada JKP d.o.o. Vareš.

Nakon izjašnjavanja vijećnika predsjedavajući OV konstatuje da je **sa 17 glasova „ZA“ usvojena**

***Odluka o povjeravanju na upravljanje i raspolaganje
opremom za prikupljanje otpada JKP d.o.o. Vareš.***

Ad. 11.

**(Prijedlog Rješenja o brisanju prava vlasništva
i posjeda D.S. KUD „Branko Jelić“ Pržići)**

Pomoćnik načelnika Ermin Musa dao je dodatno pojašnjenje za ovu tačku dnevnog reda.

Otvorena je rasprava u kojoj je učestvovao vijećnik Nikola Šimić (*postavio je pitanje nadležnim u Općini da li ima još slučajeva u mjesnim zajednicama gdje nije riješen imovinsko-pravno status društvenih objekata, sugerirao da nadležni to provjere i bude inicijator u rješavanju ove problematike i u drugim mjesnim zajednicama*).

Zaključena je rasprava i predsjedavajući OV stavio je na izjašnjavanje Prijedlog Rješenja o brisanju prava vlasništva i posjeda D.S. KUD „Branko Jelić“ Pržići.

Nakon izjašnjavanja vijećnika predsjedavajući OV konstatuje da je **sa 17 glasova „ZA“ usvojeno**

***Rješenje o brisanju prava vlasništva i
posjeda D.S. KUD „Branko Jelić“ Pržići.***

Predsjedavajući OV dao je pauzu u trajanju od 20 minuta.
Nastavljeno je sa radom sjednice.

Ad. 12.

**(Izvještaj o provođenju Odluke o
komunalnom redu općine Vareš u 2025. godini.**

Izjavitelj nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV stavio je na izjašnjavanje Izvještaj o provođenju Odluke o komunalnom redu općine Vareš u 2025. godini.

Nakon izjašnjavanja vijećnika predsjedavajući OV konstatuje da je **sa 17 glasova „ZA“ usvojen**

***Izvještaj o provođenju Odluke o
komunalnom redu općine Vareš u 2025. godini.***

Ad. 13.

**(Informacija o provođenju lokalnog ekološkog
akcionog/akcijskog plana za općinu Vareš u 2025. godini)**

Izvjestilac nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajući OV konstatuje da je **Vijeće primilo k znanju**

***Informaciju o provođenju lokalnog ekološkog
akcionog/akcijskog plana za općinu Vareš u 2025. godini.***

Ad. 14.

(Informacija o realizaciji ugovora o koncesijama u 2025. godini)

Izvjestilac nije imao dodatno pojašnjenje za ovu tačku dnevnog reda.

Otvorena je rasprava u kojoj su učestvovali vijećnici Dino Ahmedović (*uz pojašnjenje iznio je svoje mišljenje o koncesijama i izdatim saglasnostima Vijeća, traži odgovornost od Općinskog vijeća da sačuva planine i rijeke na našoj općini*) i Dario Dodik (*iznio je svoje mišljenje o koncesijama i uz pojašnjenje sugerisao da se od Vlade ZDK traži da omogući još nekome da krene sa otvaranjem kamenoloma na našoj općini i proizvodnjom materijala i obzirom da je istekao Ugovor firme „Energonova“ (MHE na rijeci Tribiji) da se suglasnost povuče*).

Zaključena je rasprava i predsjedavajući OV konstatuje da je **Vijeće primilo k znanju**

Informaciju o realizaciji ugovora o koncesijama u 2025. godini.

Ad.15.

(Tekuća pitanja)

Predsjedavajući OV upoznao je Vijeće sa tekućom poštom i to:

1. Očitovanje Službe za opću upravu, društvene djelatnosti i BiZ broj: 02/2-136/26 od 15.06. 2026. godine po Zaključku OV broj: 01-161/26 od 01.06. 2026. godine, a u vezi Zahtjeva grupe građana MZ Vareš Majdan za organizovanje ponovnih izbora. U raspravi je učestvovao vijećnik Dario Dodik.

2. Odgovor Ministarstva za privredu ZDK, broj: 04-14-9394-1/26 od 08.06. 2026. godine u vezi imenovanja članova radne grupe u toku izrade novih odredbi o koncesionoj naknadi.
- U raspravi su učestvovali predsjedavajući OV Igor Šimić, vijećnici Dario Dodik i Semir Memić koji su izrazili svoje nezadovoljstvo dostavljenim odgovorom.
- Zaključena je rasprava i predsjedavajući OV predložio je i stavio na izjašnjavanje sljedeći

Zaključak:

Općinsko vijeće Vareš izražava nezadovoljstvo Odgovorom Ministarstva za privredu Zeničko-dobojskog kantona, broj: 04-14-9394-1-1/26 od 08.06. 2026. godine.

Općinsko vijeće Vareš traži od Ministarstva za privredu Zeničko-dobojskog kantona da Vijeću dostavi jasno i argumentovano pravno obrazloženje, uz navođenje konkretnih zakonskih odredbi, na osnovu kojih smatra da vijećnik Općinskog vijeća Vareš ne može učestvovati u radu radne grupe za izradu novih odredbi o koncesionoj naknadi.

Nakon izjašnjavanja vijećnika predsjedavajući konstatuje da je sa 17 glasova „ZA“ usvojen predloženi Zaključak.

3. Vijećnik Asmir uz dato obrazloženje predložio je sljedeće Zaključke:
1. Općinsko vijeće Vareš traži od Ministarstva za obrazovanje, nauku, kulturu i sport Zeničko-dobojskog kantona da odobri zahtjeve osnovnih škola sa područja općine Vareš (JU OŠ „Vareš“ Vareš, JU OŠ „Vareš Majdan“ Vareš i Mala škola Vareš) za:
 - davanje saglasnosti za odjeljenja
 - angažovanje stručnog kadra za djecu sa poteškoćama u razvoju u obliku kakvim ih navedene ustanove dostave.
 2. Zadužuje se Općinski načelnik da u saradnji sa direktorom Javne ustanove „Dom zdravlja“ Vareš nađe rješenje po pitanju potrebe angažovanja neophodne stručne pomoći specijaliste logopeda na minimalno dva sedmična dolaska u Vareš.
 3. Zadužuje se Općinski načelnik da pri izradi Budžeta Općine Vareš za 2027. godinu planira sredstva subvencioniranja troškova prijevoza i liječenja djece sa poteškoćama u razvoju s područja općine Vareš.
 4. Zadužuje se Općinski načelnik da se uključi i pomogne realizaciju projekta “Senzorne sobe“ Male škole Vareš.

U raspravi je učestvovao vijećnik Nazif Hajrić koji je uz pojašnjenje predložio dopunu prijedloga Zaključka br. 3 da se i od Vlade ZDK traži da u Budžetu za 2027. godinu planiraju sredstva.

Zaključena je rasprava i predsjedavajući OV stavio je na izjašnjavanje sljedeće

Zaključke:

1. **Općinsko vijeće Vareš traži od Ministarstva za obrazovanje, nauku, kulturu i sport Zeničko-dobojskog kantona da odobri zahtjeve osnovnih škola sa područja općine Vareš (JU OŠ „Vareš“ Vareš, JU OŠ „Vareš Majdan“ Vareš i Mala škola Vareš) za:**

- davanje saglasnosti za odjeljenja
 - angažovanje stručnog kadra za djecu sa poteškoćama u razvoju u obliku kakvim ih navedene ustanove dostave.
2. **Zadužuje se Općinski načelnik da u saradnji sa direktorom Javne ustanove „Dom zdravlja“ Vareš nađe rješenje po pitanju potrebe angažovanja neophodne stručne pomoći specijaliste logopeda na minimalno dva sedmična dolaska u Vareš.**
 3. **Traži se od Općinskog načelnika da prilikom izrade Budžeta Općine Vareš za 2027. godinu, planira sredstava za subvencioniranje troškova prijevoza i liječenja djece sa poteškoćama u razvoju s područja općine Vareš.**
Traži se od Vlade Zeničko-dobojskog kantona da prilikom izrade Budžeta ZDK za 2027. godinu planira sredstva za subvencioniranje troškova prijevoza i liječenje djece sa poteškoćama u razvoju s područja kantona, pokrene potrebne procedure i poduzme sve aktivnosti iz svoje nadležnosti s ciljem uspostavljanja systemske podrške djeci sa poteškoćama u razvoju, uključujući finansiranje i sufinansiranje svih neophodnih usluga i troškova koji doprinose njihovom liječenju, rehabilitaciji i kvalitetnijem životu.
 4. **Zadužuje se Općinski načelnik da se uključi i pomogne realizaciju projekta „Senzorne sobe“ Male škole Vareš.**

Nakon izjašnjavanja vijećnika predsjedavajući OV konstatuje da **su sa 17 glasova „ZA“ usvojeni predloženi Zaključci.**

4. Vijećnik Nermin Hrvat uz pojašnjenje predložio je sljedeći

Zaključak:

Općinsko vijeće Vareš daje podršku općinskom načelniku i nadležnoj službi da omogući besplatan produženi rad svim ugostiteljskim objektima na području općine Vareš u noći sa 1. na 2. juli 2026. godine, a povodom odigravanja utakmice BiH – SAD.

Zadužuje se općinski načelnik da putem nadležne općinske službe, a u skladu sa aktima Općine Vareš i ovim Zaključkom omogući produženi rad ugostiteljskih objekata.

U raspravi su učestvovali: sekretar OV Mersad Đido, vijećnici Dario Dodik i Asmir Čizmo.

Zaključena je rasprava i predsjedavajući OV stavio je na izjašnjavanje predloženi Zaključak i nakon izjašnjavanja vijećnika konstatuje da je **sa 17 glasova „ZA“ usvojen predloženi Zaključak.**

5. Vijećnik Nikola Šimić podsjetio je prisutne na održani protestni skup u Lukama na kome su se okupili mještani sela Dragovići, Mijakovići, Borovica i Kopjari i izrazili nezadovoljstvo održavanjem i stanjem regionalne ceste R-444a. Sugerisao je općinskim službama da se za narednu godinu dio koncesionih naknada planira za sanaciju putne komunikacija u ovim mjesnim zajednicama.
- Vijećnik Dario Dodik predložio je da se na sljedeću sjednicu OV pozovu predstavnici Direkcije za ceste i nadležnog ministarstva ZDK, a u vezi njegove Inicijative podnesene na današnjoj sjednici da se u dnevni red naredne sjednice uvrsti tačka u vezi stanja regionalnih cesta na području općine Vareš.

Predsjedavajući je konstatovao da će nadležna Služba uputiti poziv nadležnim iz Kantona.

6. Vijećnik Dario Dodik uz pojašnjenje sugerisao je da se kontejneri koji se daju na upravljanje i korištenje JKP d.o.o. Vareš numerišu i označe sa brojem i datumom kad su predati preduzeću.
7. Vijećnik Igor Hinger uz pojašnjenje zamolio je da sekretar OV na narednoj sjednici izvijesti Vijeće o realizaciji zaključaka koje je Vijeće donijelo u zadnjih šest mjeseci.


Sjednica je završena u 16.45 sati.

Sastavni dio ovog Zapisnika je audio zapis 17. sjednice OV Vareš.

**SEKRETAR
OPĆINSKOG VIJEĆA**

Mersad Dido



**PREDSEDavajući
OPĆINSKOG VIJEĆA**

Igor Šimić